

IZVJEŠTAJ O RADU DIREKCIJE ZA EVROPSKE INTEGRACIJE ZA 2015. GODINU

NAJVAŽNIJE AKTIVNOSTI I STANJE U OBLASTI

Nakon stupanja na snagu Sporazuma o stabilizaciji i pridruživanju uspostavljena su nova zajednička tijela između BiH i EU, Vijeće za stabilizaciju i pridruživanje i Odbor za stabilizaciju i pridruživanje, čiji su prvi sastanci održani u decembru u Briselu. Odbor je usvojio Odluku br. 1/2015 kojom se osniva sedam pododbora kao i posebna grupa za reformu javne uprave. DEI je pripremila obrazac Akcionog plana za realizaciju prioriteta iznesenih u Izvještaju za BiH za 2015. godinu i dostavila ga nadležnim institucijama u BiH radi pripreme prijedloga mjera za realizaciju prioriteta. U vezi sa usklađivanjem zakonodavstva s *acquis-em*, u izvještajnom razdoblju Direkcija je izvršila provjeru usklađenosti 90 propisa i o tome izradila mišljenja o usklađenosti s *acquis-em*.

Okvirni sporazum za IPA II između BiH i EK stupio je na snagu 24.8.2015. godine. Vijeće ministara BiH je 25.6.2015. odobrilo tri sektorska planska dokumenta za javnu upravu, provođenje zakona, vladavinu prava i osnovna prava 2015-2017, koji predstavljaju osnovu za pripremu godišnjih državnih IPA programa. Na istoj je sjednici Vijeća usvojen i godišnji paket IPA 2015, kojeg je potom Evropska komisija usvojila u decembru 2015. iznosu od 37,2 miliona eura. U toku je priprema sektorskih planskih dokumenata za preostala dva IPA II sektora. U vezi sa uvođenjem nove metodologije za korištenje WBIF-a u BiH u skladu sa zahtjevima EU i prioritetima Agende za povezivanje Zapadnog Balkana, uspostavljen je Državni odbor za investicije, izrađena je i usvojena Metodologija za odabir i prioritizaciju infrastrukturnih projekata u BiH, te pripremljena i usvojena Jedinствена lista prioriternih infrastrukturnih projekata u BiH (za sektor transporta). Završeno je ugovaranje projekata odobrenih kroz posljednje pozive u okviru bilateralnih programa prekogranične suradnje Hrvatska-BiH i BiH-Crna Gora iz IPA 2017-2013, te objavljen treći poziv u okviru programa Srbija-BiH. Nakon što je EK tokom 2015. godine odobrila preostale programe teritorijalne suradnje IPA II 2014-2020, započeta je faza implementacije.

U vezi s prevođenjem dokumenata relevantnih za proces integracije, ukupno su prevedene i/ili revidirane 3 262 prevodilačke kartice, te je nakon verifikacije u terminološku bazu BiHterm uneseno 740 novih termina.

Nastavljena je realizacija Komunikacijske strategije za informiranje javnosti o procesu pristupanja BiH u EU, te Plana i programa edukacije i stručnog usavršavanja državnih službenika o procesu evropskih integracija.

ZAKLJUČIVANJE MEĐUNARODNIH UGOVORA

Okvirni sporazum za IPA II između Bosne i Hercegovine i Evropske komisije (EK) za period 2014.-2020. stupio je na snagu 24.8.2015. godine. Okvirni sporazum predstavlja osnov za korištenje sredstava IPA II (2014-2020), zaključuje se između Evropske komisije i države korisnice IPA II, a njime se definišu principi finansijske suradnje između zemlje korisnika i

Evropske komisije. Direkcija za evropske integracije je doprinijela procesu izrade Instrukcije o postupku ostvarivanja carinskih i poreznih oslobođanja u skladu sa Okvirnim sporazumom između BiH i EK o aranžmanima za provođenje finansijske pomoći Unije Bosni i Hercegovini u okviru Instrumenta pretpristupne pomoći (IPA II). Instrukcija („Službeni glasnik BiH“, broj 91) je u primjeni od 11.11.2015.

Sporazum o finansiranju IPA državnog programa za BiH za 2014. u iznosu od 22. 581. 834 eura i Sporazum o finansiranju IPA 2014 Programa posebnih mjera oporavka nakon poplava i upravljanja rizikom od poplava – dio za BiH, u iznosu 51 milion eura, potpisani su i sredstva su postala operativna 23.11.2015.

EVROPSKE INTEGRACIJE

U izvještajnom razdoblju do stupanja na snagu Sporazuma o stabilizaciji i pridruživanju (SSP) 1. 6. 2015., Direkcija za evropske integracije je obavljala funkciju Sekretarijata Privremenog odbora. Održan je sedmi ciklus sastanaka pododbora za praćenje provedbe Privremenog sporazuma, odnosno 6 sastanaka pododbora. Nakon **stupanja na snagu SSP-a** uspostavljena su nova zajednička tijela između BiH i Evropske unije (EU), Vijeće za stabilizaciju i pridruživanje i Odbor za stabilizaciju i pridruživanje. Odbor je usvojio Odluku br. 1/2015 kojom se osniva sedam pododbora kao i posebna grupa za reformu javne uprave. Direkcija za evropske integracije u okviru novih tijela nastavlja da koordinira i prati, te izvještava Vijeće ministara BiH i Parlamentarnu skupštinu BiH o provedbi SSP-a.

U skladu sa zahtjevom EK, DEI je u maju 2015. u suradnji i koordinaciji s institucijama, izradila **Prilog institucija u BiH za redovni godišnji Izvještaj EK**, te ga u septembru dopunila novim informacijama. U okviru Dopune priloga institucija u BiH, a slijedom traženja EK da BiH prilagodi izvještavanje u procesu evropskih integracija potrebama nove metodologije ocjenjivanja napretka, DEI je u suradnji i koordinaciji sa nadležnim institucijama u BiH pripremila *Prilog urađen po novoj metodologiji izvještavanja*. Po objavi Paketa proširenja za 2015. godinu, DEI je pripremila Informaciju o nalazima i ocjenama Evropske komisije sadržanim u Izvještaju za 2015. godinu i Strategiji proširenja EU, koja sadrži ocjene za BiH za trenutno stanje spremnosti za članstvo i postignuti napredak za sve oblasti, kao i prioritete EU koje je neophodno provesti. U skladu sa zaključkom Vijeća ministara BiH, DEI je pripremila obrazac Akcionog plana za realizaciju prioriteta iznesenih u Izvještaju za BiH za 2015. godinu i dostavila ga nadležnim institucijama u BiH radi pripreme prijedloga mjera za realizaciju prioriteta.

Stupanjem na snagu SSP-a, u fokus je stavljena njegova cjelokupna provedba, uključujući i dio koji se odnosi na izradu programa usklađivanja zakonodavstva s *acquis*-em i praćenje ovog procesa. U skladu s tim Direkcija za evropske integracije je pokrenula aktivnost izrade **Programa integriranja BiH u EU**, tj. pripremila Smjernice za izradu Programa integriranja BiH u EU i Plan izrade Programa, kojim je utvrđena potrebna operativna struktura, postupak i potrebni vremenski okvir za izradu ovog dokumenta, kao i prijedlog inicijalne podjele 45.876 pravnih akata EU (prva faza u izradi Programa integriranja). Organiziran je sastanak Komisije za evropske integracije radi informiranja o zadatku izrade Programa, prezentacije Programa kao instrumenta za implementaciju preuzete ugovorne obaveze (član 70. SSP-a), te

organizacije i procesa njegove izrade u BiH. Na sastanku su članovi Komisije za EI ukazali na potrebu dodatnih konsultacija s tehničkog i ispunjavanja preduslova s proceduralnog aspekta za izradu Programa integriranja. Naredni koraci u ovom kontekstu u vezi su i sa aktivnostima koje se odnose na unaprijeđeni mehanizam koordinacije.

U toku 2015. godine Direkcija za evropske integracije je radila na pripremama za davanje odgovora na Upitnik EK a nakon podnošenje Zahtjeva za članstvo. U skladu sa tim, Vijeće ministara BiH i Predsjedništvo BiH usvojili su Infomaciju o spremnosti BiH za predaju zahtjeva za članstvo u EU kao i o neophodnim unutrašnjim pripremama za davanje odgovora na Upitnik EK.

U vezi sa usklađivanjem zakonodavstva s *acquis*-em, u izvještajnom razdoblju Direkcija je izvršila **provjeru usklađenosti 90 propisa** i o tome izradila mišljenja o usklađenosti s *acquis*-em. Predstavnici Direkcije sudjelovali su u radu 6 radnih grupa za izradu propisa. Na traženje obrađivača/predlagača propisa, prije dostavljanja propisa na provjeru usklađenosti, obavljeno je 35 konsultacija elektronskim putem i na posebnim sastancima pri čemu je pružena stručna pomoć s aspekta metodologije usklađenosti i tumačenja pravnih propisa EU, kao i pomoć u izradi instrumenata za usklađivanje. Obrađena su 42 zahtjeva za korištenje TAIEX-a, od čega 8 zahtjeva za studijske posjete, 18 zahtjeva za organizaciju seminara u BiH i 16 zahtjeva za dolazak eksperata. Održano je ukupno 23 seminara po pozivu TAIEX-a, na kojima je prisustvovalo ukupno 50 državnih službenika, i to 32 državna službenika iz institucija Bosne i Hercegovine, 9 iz Federacije Bosne i Hercegovine, 8 iz Republike Srpske te 1 državni službenik iz Brčko distrikta BiH. Redovno se održavaju baza mišljenja o usklađenosti propisa BiH sa odredbama propisa EU i baza zakonodavstva BiH.

U okviru **IPA programiranja**, na osnovu zaključka Vijeća ministara iz aprila 2015. u suradnji sa imenovanim resornim koordinirajućim institucijama formirane su sektorske radne grupe za izradu tri sektorska planska dokumenta (javna uprava, provođenje zakona, vladavina prava i osnovna prava) za IPA II. Sektorske radne grupe su uključile predstavnike nadležnih institucija, civilno društvo, članove iz donatorske zajednice i međunarodnih organizacija. Tokom maja održane su dvije radionice u svakoj grupi. Izrada sektorskih planskih dokumenata podrazumijevala je i pisane konsultacije u pripremi i između radionica. Provedene su i dodatne konsultacije pisanim putem sa odgovarajućim kantonalnim institucijama. Početkom juna završena je izrada pomenuta tri sektorska planska dokumenta za IPA za period 2015-2017. Vijeće ministara BiH je 25.6.2015. odobrilo pripremljene dokumente, te su dostavljeni Evropskoj komisiji. U toku je priprema sektorskih planskih dokumenata za preostala dva IPA II sektora: za konkurentnost i inovacije: lokalne razvojne strategije, te za zapošljavanje sa obrazovanjem i socijalnom politikom za period 2016-2017. Proces izrade ovih sektorskih planskih dokumenata pokrenut je u oktobru 2015. Tokom novembra i decembra, u suradnji sa imenovanim resornim koordinirajućim institucijama, formirane su sektorske radne grupe za pripremu ovih SPD-ova, te održani prvi sastanci sektorskih radnih grupa, kao i upriličene dodatne radionice i konsultacije u skladu sa specifičnostima datih IPA II sektora. Proces pripreme sektorskih planskih dokumenata obuhvatiti će ukupno deset radionica, uključujući posebne konsultacije sa kantonalnim ministarstvima obrazovanja i jedinicama lokalne samouprave, a završetak pripreme ovih

dokumenata očekuje se u februaru 2016. Sektorski planski dokumenti su radni višegodišnji planski dokumenti za potrebe programiranja IPA II i predstavljaju uslov i osnovu za pripremu godišnjih državnih IPA programa.

Pripremljen je godišnji paket IPA 2015 i dostavljen EK nakon usvajanja u Vijeću ministara 25.6.2015. Evropska komisija je predloženi paket u iznosu od 37,2 miliona eura usvojila u decembru 2015.

Vijeće ministara je u januaru i maju informirano o usvajanju prijedloga akcija za 2014. godinu, kao i o usvajanju Višegodišnjeg strateškog dokumenta 2014-2020 iz Programa **višedržavne IPA II**. Tokom 2015. provedene su konsultacije sa relevantnim institucijama o okvirnoj listi projekata razmatranih za finansiranje iz višedržavne IPA II, paket za 2016. Konsultacije su osim nadležnih institucija obuhvatile civilno društvo, ostale donatore i međunarodne organizacije.

Nakon informacije iz EK, članovi Vijeća ministara BiH su 8.10.2015. godine informirani o usvajanju Programa višedržavne IPA za 2015. godinu i izmjenama Programa višedržavne IPA za 2014. godinu. Predstavnici ureda DIPAK-a učestvovali su na dva koordinaciona sastanka o Višedržavnoj IPA-i u Prištini u junu i Briselu u oktobru. Poslije sastanka u Briselu, osnovne informacije u svakoj razmatranoj akciji za program za 2016. dostavljene su nadležnim institucijama. Predstavnici ureda su učestvovali u pripremi i realizaciji zajedničkih inicijativa zemalja korisnica Višedržavne IPA II prema Evropskoj komisiji. Nastavljene su koordinativne aktivnosti s institucijama u BiH u vezi sa realizacijom pojedinih projekata i akcija u okviru Višedržavne IPA I i II. Ranije izrađena baza projekata višedržavne IPA je dalje dograđivana i održavana.

Putem internetske stranice DEI, te neposrednim učešćem odabranih predstavnika u sektorskim radnim grupama, ured DIPAK-a je nastavio praksu provođenja **konsultacija sa civilnim društvom** i najširoim zainteresiranom javnosti u vezi s aktivnostima iz domena rada (planiranje i programiranje IPA II pomoći, državni paket i paket višedržavne IPA II). U suradnji s projektom „Jačanje kapaciteta vladinih institucija za učešće u političkom dijalogu sa civilnim društvom“, započeta je izrada web aplikacije putem koje bi trebalo da se provode obavezne konsultacije za civilnim društvom, čime bi ovaj proces bio još otvoreniji ka zainteresiranim učesnicima.

Predstavnici ureda DIPAK-a su učestvovali na sastanku koordinacije donatora, dva sastanka Programskog odbora i na sastanku Upravljačkog odbora u okviru realizacije **SEE 2020**. Predstavnici ureda su u decembru organizirali konsultacije o Dokumentu za programiranje SEE 2020 - Provedba Strategije kroz vodeće inicijative, 2016-2018. Radi se o novom dokumentu pripremljenom od Vijeća za regionalnu suradnju (RCC) kojim se uvodi novi pristup u implementaciji Strategije SEE 2020, a podrazumijeva povezivanje nekoliko širokih tema kako bi se udružili naponi različitih aktera u implementaciji prema jednom setu ciljeva. Ove teme, odnosno vodeće inicijative (eng. „flagship initiatives“) se odnose na sljedeće: 1. Vještine i mobilnost, 2. Povezanost i 3. Konkurentnost.

Nastavljena je suradnja sa Ministarstvom vanjskih poslova BiH odnosno određenim državnim kontakt osobama za Strategije EU-e za Dunavsku (**EUSTR**) i Jadransko-jonsku makroregiju (**EUSAIR**). Na osnovu odluke/poziva EK i zemalja članica, ured DIPAK-a je odredio predstavnika u Upravljački odbor EUSAIR, gdje je preuzeo funkciju Nacionalnog koordinatora za EU fondove u EUSAIR. Predstavnik ureda je učestvovao na dva sastanka Upravljačkog odbora EUSAIR. Nastavljene su pripremne aktivnosti za početak provedbe EUSAIR. S tim u vezi, EK je informirana da će ulogu Projektnog partnera za realizaciju strateškog projekta podrške upravljačkoj strukturi EUSAIR u BiH preuzeti ured DIPAK-a. Članovi Vijeća ministara su 12.11.2015. informirani o ovim i pratećim aktivnostima bitnim za realizaciju EUSAIR.

Predstavnici DEI su tokom 2015. učestvovali u realizaciji više aktivnosti u okviru projekta GIZ SPI/ Jačanje javnih institucija (bilateralni plan i međuinstitucionalne grupe), regionalne mreže EU integracijskih ureda u okviru programa GIZ ORF/Otvoreni regionalni fond i regionalne mreže ureda koji upravljaju IPA-om u okviru programa GIZ ORF. Uz pomoć projekta GIZ SPI obezbjeđena je kratkoročna strateška tehnička pomoć za realizaciju procesa pripreme sektorskih planskih dokumenata u drugoj fazi pripreme.

U toku 2015. godine, objavljena su dva poziva za podnošenje grant aplikacija za tehničku asistenciju (13. i 14. tehnička runda) u okviru **WBIF**-a, pri čemu su za BiH odobrene 2 aplikacije u socijalnom sektoru (14. runda), u ukupnom iznosu 1 650 000 eura. Uspješno su realizirane aktivnosti na uvođenju nove metodologije za korištenje WBIF-a u BiH u skladu sa EU zahtjevima i prioritetima Agende za povezivanje Zapadnog Balkana. Na osnovu toga, uspostavljen je Državni odbor za investicije, izrađena je i usvojena Metodologija za odabir i prioritizaciju infrastrukturnih projekata u BiH, te pripremljena i usvojena Jedinствена lista prioriternih infrastrukturnih projekata u BiH (za sektor transporta). Paralelno sa ovim procesom, pripremljene su dvije aplikacije za sufinansiranje investicionih grantova kroz WBIF program za 2015. (prekogranični mostovi Gradiška i Svilaj) koje su usvojene u ukupnom iznosu od 28,2 miliona eura.

Završeno je ugovaranje projekata odobrenih kroz posljednje pozive za podnošenje projektnih prijedloga u okviru bilateralnih programa **prekogranične suradnje** Hrvatska-BiH i BiH-Crna Gora. Objavljen je posljednji, treći poziv za podnošenje projektnih prijedloga u okviru programa Srbija-BiH, kroz koji su preostala raspoloživa sredstva iz 2012. i 2013. godine usmjerena na projekte za oporavak i prevenciju od poplava. Evaluacija pristiglih projektnih prijedloga je u toku. Uprkos problemima u okviru IPA Jadranskog programa prekogranične suradnje (zbog lošeg funkcioniranja upravljačkih struktura u Italiji u prethodnom periodu i odluke EK o suspenziji plaćanja sve dok Upravljačko tijelo, u skladu sa nalazima EK, ne implementira niz korektivnih mjera) nastavljena je implementacija projekata iz posljednjeg strateškog poziva. Upravljačko tijelo (talijanska regija Abruzzo) je u međuvremenu finansiralo implementaciju projekata iz vlastitih sredstava, a prema posljednjim informacijama, EK je najavila skoro ukidanje suspenzije plaćanja. Implementacija projekata u okviru SEE i MED transnacionalnih programa je završena, te se u 2016. godini očekuje priprema i podnošenje finalnih izvještaja o implementaciji.

Nakon što je EK tokom 2015. godine odobrila preostale **programe teritorijalne suradnje IPA II 2014-2020**, započeta je implementacija. U okviru MED i Dunavskog programa, objavljeni su i prvi pozivi, dok se u okviru ostalih relevantnih programa za BiH prvi pozivi planiraju u 2016. godini (ADRION, trilateralni Hrvatska-BiH-Crna Gora i dva bilateralna Srbija-BiH i BiH-Crna Gora). Uspostavljeni su Monitoring komiteti za sva tri transnacionalna programa te započet proces imenovanja predstavnika BiH u Zajedničkim monitoring komitetima programa prekogranične suradnje. U skladu sa relevantnim odlukama EK, DEI je zaključila servisni ugovor sa Delegacijom EU u BiH za korištenje programskih sredstava za tehničku pomoć u okviru programa BiH-Crna Gora. U pripremi je i niz drugih relevantnih sporazuma/MoU/dokumenata neophodnih za implementaciju na nivou svakog od programa.

U 2015. godini, DEI je nastavila pružati podršku i pratiti učešće BiH u **programima Evropske unije**, kroz suradnju sa relevantnim institucijama za pojedinačne programe u zemlji, vezano za učešće BiH i pristupanje programima: Evropa za građane, Fiscalis 2020, Carine 2020, Zdravlje za razvoj, COSME, Pravosuđe. BiH je u 2015. godini postala članicom dva programa u okviru novoga ciklusa programa EU 2014-2020: Fiscalis 2020 i Carine 2020, te je potpisala sporazum o učešću u programu Evropa za građane. Za sva tri pomenuta programa početak učešća očekuje se od 2016. godine. U toku je pristupanje programu COSME, a tokom 2015. godine BiH je pokrenula proceduru za pristupanje programu Zdravlje za razvoj. U okviru državnog programa IPA 2015 planirana su i osigurana sredstva za sufinansiranje ulaznih karata za EU programe za 2016. godinu (Horizont 2020, Kreativna Evropa, Erasmus+, COSME, Zdravlje za razvoj, Pravosuđe), i dijelom za prethodne godine (ulazne karte za 2014. i 2015. za Horizont 2020).

U 2015. godini u suradnji s Delegacijom EU organizirana su i održana dva sastanka **Odbora za praćenje IPA projekata** (februar i oktobar) na kojime je diskutirano o ukupno 27 IPA projekata u realizaciji (za koje je DEI pripremila izvještaje i uputila ih EK). Informacija o održanom 10. sastanku IPA Odbora za praćenje upućena je Vijeću ministara BiH. Na osnovu podataka iz Delegacije EU nakon sastanaka Odbora za praćenje IPA-e, pripremljene su analize o iskorištenosti IPA-e iz državnih paketa 2007-2013. Izrađena je analiza i dostavljeni su ROM monitoring izvještaji voditeljima projekata u korisničkim institucijama. Održavaju se redovni sastanci sa voditeljima projekata radi prikupljanja informacija o realizaciji projekata. U 2015. predstavnici ureda DIPAK-a sudjelovali su u provedbi **evaluacije** Evropske komisije za sektor šumarstva, prometa i prerade drveta (EU Flag Action plan); nestandardne evaluacije IPA II - Monitoring, izvještavanje i okvir za procjenu učinka; tematske evaluacije EK za oblast antikorupcije, te su komentirali evaluaciju EK-Treća interim evaluacija i metaevaluacija IPA.

Unutar Direkcije prevedeni su i revidirani svi dokumenti relevantni za rad tijela za provedbu Sporazuma o stabilizaciji i pridruživanju, kao i Izvještaj Evropske komisije za BiH i Strategija proširenja za 2015. Prevedeni su brojni dokumenti koji se tiču IPA II. Ukupno su **prevedene i/ili revidirane 3 262 prevodilačke kartice**. Iz najznačajnijih prevoda izdvojeni su stručni termini, koji su usaglašeni sa nadležnim institucijama nakon čega je u terminološku bazu Direkcije BiH term uneseno 740 novih termina. Zaključno sa decembrom 2015. godine u BiH termu se nalazi 20167 termina.

U skladu sa zaključcima Vijeća ministara izvršena je analiza prevodilačkih kapaciteta na svim nivoima vlasti u BiH kao i analiza tržišta prevodilačkih usluga. Nakon sastanka sa koordinatorima za prevođenje, koje su imenovale institucije BiH i vlade entiteta i Brčko distrikta BiH, sačinjene su preporuke čiji je cilj izgradnja i umrežavanje prevodilaca u institucijama u BiH. Izrađen je Pojmovnik sa terminima iz novog Instrumenta za pretpristupnu pomoć (IPA II) čija štampa i promocija se očekuje u prvoj polovini 2016.

U skladu sa Memorandumom o suradnji između DEI i četiri filozofska/filološka fakulteta u BiH u prvom kvartalu u Direkciji je stažiralo 17 studenata sa ovih fakulteta. U decembru je održana prezentacija o pravnom prevođenju i terminologiji na Filozofskom fakultetu Univerziteta u Mostaru.

Ostvarena je suradnja na regionalnom nivou i usvojene inicijative Direkcije o konkretnim aktivnostima i vidovima suradnje između ureda nadležnih za proces prevođenja u državama regije.

Realizacija aktivnosti predviđenih **Komunikacijskom strategijom za informiranje javnosti** o pristupanju Bosne i Hercegovine Evropskoj uniji obavlja se na temelju godišnjih Akcionih planova Direkcije za evropske integracije koji su osnova za preduzimanje njenih komunikacijskih aktivnosti. Planiranje, a samim tim i provedba aktivnosti u 2015. godini, kao i prethodnih godina, bili su uslovljeni ograničenim budžetskim sredstvima, kao i činjenicom da se realizacija promotivnih aktivnosti knjiži kao reprezentacija, što znatno opterećuje stavke budžetskih rashoda institucije i utiče na dinamiku promotivnih aktivnosti. S obzirom na navedeno, DEI je promociju procesa evropskih integracija i u 2015. godini nastavila usmjeravati na *online* komuniciranje i izdavaštvo.

Vezano za *online* komuniciranje, trend rasta praćenja Direkcije na društvenim mrežama nastavljen je u 2015. godini, a tokom godine započeta je reorganizacija sadržaja internet stranice Direkcije. Pripremljen je i usvojen dokument „Strategija *online* komunikacije“ Direkcije za evropske integracije čija je svrha određivanje ciljeva, smjernica i pravila za komunikaciju na Internet kanalima koje Direkcija koristi u skladu s potrebama i raspoloživim resursima. Nastavljena je objava elektronskih izdanja DEI Biltena Europuls i magazina za najmlađe - EU Palčić. Nastavljeno je i izdavanje naučno-stručnog časopisa o evropskim integracijama Sui Generis, uz finansijsku podršku GIZ-a objavljen je drugi broj (elektronsko i štampano izdanje) i započeta priprema trećeg.

Provedeno je i redovno istraživanje javnog mnijenja, rezultati istraživanja predstavljeni su Vijeću ministara BiH, a na parcijalnoj osnovi medijima i općoj javnosti u BiH.

U okviru projekta razvojne pomoći Republike Hrvatske zemljama regije koju provode Centar za izvrsnost Ministarstva vanjskih i europskih poslova RH i Direkcija za evropske integracije, organizirane su četiri tematske radionice za predstavnike lokalne uprave u Tešnju, Tuzli, Prijedoru i Bugojnu. Organizirane su i radionice za novinare i studente završnih godina novinarstva o temi „Naučene lekcije – Medijsko izvještavanje o procesu integriranja Republike Hrvatske“ u Banjaluci, Sarajevu i Mostaru. U suradnji sa Centrom za društvena istraživanja Internacionalnog Burč univerziteta organizirana je Međunarodna naučno-stručna

konferenciju pod nazivom „Usklađivanje zakonodavstva sa *acquis-em*“. Komunikacijski su praćene i radionice namijenjene izradi Sektorskih planskih dokumenata za IPA II. Nastavljena je distribucija promotivnih materijala nadležnim institucijama i agencijama radi daljne distribucije građanima, ali su količine znatno smanjene zbog nedovoljnih finansijskih sredstava. Konferencijom o proaktivnoj transparentnosti u javnoj upravi Direkcija za evropske integracije je skupa sa Agencijom za statistiku, Uredom koordinatora za reformu javne uprave, Agencijom za razvoj visokog obrazovanja i osiguranje kvaliteta i u suradnji sa organizacijama civilnog društva obilježila Međunarodni dan slobode pristupa informacijama.

U 2015. godini ukupno je realizirano 67 **obuka** koje je pohađalo 957 polaznika. Najviše polaznika je bilo iz institucija sa državnog nivoa i to 426, iz institucija u FBiH (uključujući i kantone i općine) 368, iz institucija RS (uključujući i općine) 90, a 14 iz Vlade Brčko distrikta BiH. Iz kategorije ostalih (NVO, akademska zajednica, kulturne i obrazovne institucije i sl.) bilo je 59 polaznika. Za realizaciju obuka finansiranih bužetskim sredstvima DEI utrošeno je 31.860,00 KM.

Broj obuka realiziranih u okviru bilateralne suradnje se smanjuje. U 2015. realizirane su 22 obuke kroz bilateralnu suradnju, što je umanjeње u odnosu na prošlu godinu i što predstavlja 33% ukupno organiziranih obuka za ovu godinu. Podršku realizaciji obuka iz oblasti evropskih integracija su dala četiri donatora: njemački GIZ, EIPA iz Luxemburga i Ministarstvo vanjskih i evropskih poslova Republike Hrvatske i holandski program razvojne pomoći MATRA.

Nastavljeno je korištenje on-line modula obuke iz oblasti evropskih integracija koji su postavljeni na web stranici Direkcije. U periodu juli 2011.- kraj 2015. ove module je pogledalo 51 577 korisnika. Aktuelna su tri modula: Osnove EU integracija, Pristupanje EU i Upravljanje projektnim ciklusom. Moduli podliježu redovnom održavanju, a trenutno se radi revizija sadržaja prva dva nabrojana modula radi usklađivanja njihovog sadržaja sa aktualnostima u procesu evropskih integracija. Registriranih korisnika iz institucija uprave u BiH ima 177.

PLANIRANI I REALIZIRANI PROGRAMSKI ZADACI

Osim svih spomenutih realiziranih zadataka u skladu s planom rada Direkcije, realizirani su i ostali u oblasti **finansijsko-računovodstvenih poslova**: završni račun za 2014. godinu; dinamički plan rashoda po usvojenom Zakonu o Budžetu institucija i međunarodnih obaveza BiH za 2015. godinu; periodični finansijski izvještaji za tri kvartala 2015. godine; Dokument okvirnog budžeta za period 2016-2018. godine (DOB); Projekcija budžeta DEI-a za 2016. godinu; učestvovanje u realizaciji dvanaest projekata posebne namjene, od čega je sedam IPA bilateralnih projekata tehničke podrške za učinkovitu provedbu prekogranične suradnje BiH i susjednih zemalja (Hrvatska, Srbija i Crna Gora), četiri transnacionalna programa suradnje i jedan Ugovor za lokalnu novčanu pomoć sa GIZ-om, kao i jedan višegodišnji projekat pod nazivom „ Podrška procesu evropskih integracija Bosne i Hercegovine za period od 2015. do 2017. godine“.

Realizirane su aktivnosti u oblasti **pravnih poslova, upravljanja ljudskim potencijalima i radno-pravnim pitanjima**: interni pravilnici i procedure; aktivnosti na realizaciji usvojene dinamike zapošljavanja državnih službenika i zaposlenika (javni konkursi, interni oglasi, interni premještaji); realizacija Plana obuka i stručnog usavršavanja; ocjenjivanje rada svih državnih službenika u skladu sa zakonskom regulativom; izrada svih pravnih akata vezanih za radno pravni status uposlenika i sl.

U oblasti **informatičko – dokumentacionih poslova** nastavljena je suradnja sa osobljem “e-vlade” VM BiH; obavljena dorada aplikacije za inicijalnu podjelu acquis-a na nivou DEI-a; dorada aplikacije „Personalna evidencija“, razvoj aplikacija na SharePoint-u: adresar osoblja i institucija; održavanje postojećih aplikacija na SharePoint-u: arhiva dokumentacije vezane za proces integracija, kreiranje dokumenta Prilog institucija, aplikacija za pododbore, staranje o stanju informatičke opremljenosti uposlenih, kontinuirano obavljanje dokumentaciono-bibliotečkih poslova;

PRORAČUNSKA SREDSTVA

Za realizaciju Plana rada Direkcije za evropske integracije za 2015. godinu su odobrena sredstva u iznosu od 3.764.000 KM i ona su za 101.000 KM veća u odnosu na odobrena sredstva nakon rebalansa Budžeta za 2014. godinu. Na tekuće izdatke raspoređeno je 3.689.000 KM, a na kapitalne izdatke 75.000 KM. Realizacija ovih sredstava sa 31.12.2015. godine iznosi 3.263.434 KM (86,71%).

U 2015. godini Vijeće ministara BiH je donijelo Odluku o odobravanju višegodišnjeg projekta pod nazivom „Podrška procesu evropskih integracija Bosne i Hercegovine za period 2015. do 2017. godine“ te su za ovu namjenu u 2015. godini Direkciji odobrena sredstva iz tekuće rezerve u iznosu od 500.000 KM. Ova sredstva će se prenijeti u 2016. godinu.

Sredstva dodijeljena za projekte posebnih namjena u 2015. godini, iznose 1.228.583 KM. Iz ovih sredstava finansira se ukupno jedanaest IPA projekata prekogranične, odnosno transnacionalne suradnje, te jedan Ugovor za lokalnu novčanu pomoć sa GIZ-om. Sa 31.12.2015. godine realizirano je 536.002 KM ili 43,63 % raspoloživih sredstava.

Ukupna raspoloživa finansijska sredstva Direkcije za evropske integracije za 2015. godinu iznose 5.492.583 KM. Sa 31.12.2015. godine realizirano je 3.799.436 KM odnosno 69,18 % raspoloživih sredstava.